

Been Im Ju Pa Koe Ka daux

Phuk Lai Sigang Khri



Baux (7)

Khrawm Kaing Lai

Simin	Kaing Lai	Plah Lai
1.	Grawng Tieh Loh Cao Pawlux Ju Tix	1
2.	Pawlux Mai Silax	11
3.	Yesux Mawh Misiyax	21
4.	Lox Sijax Mukheu Pa Khraox Cie Siyiex	33
5.	Simiang Yesux Sang Deeh Hoek	47

Title: The living story from the Bible

Translated to the Wa language by:

Yex Ka Lin

Ai Sang Awng

Sam Lao Pao

I Rong Khun

Ai Kap Sin

Sai Rong Khun

Edition: First Draft

Date: 29. 7. 2016

Kheu lai rieng pa plak plih pakpeung gumlox Siyiex in kieh aik o
paox grawm mai ceu cao pa koe ka piang haktiex khawm uik
mawh buanson, riang rao ka daux
Yesux Khrit liak.

Translated from the English *Open Bible* Stories. Original work available at
unfoldingWord.org/stories

This work is licensed under the Creative Commons Attribution-
NonCommercial-ShareAlike 4.0 International License. To view a copy of this
license, visit <http://creativecommons.org/licenses/by-nc-sa/4.0/> or send a
letter to Creative Commons, PO Box 1866, Mountain View, CA 94042, USA.

Grawng Tieh Loh Cao Pawlux Ju Tix




Lai Kawncau – 6:8–8:3, 9:1–25.




Ka daux ceu cao dix, Sathephan kawx mawh cao kaing tix kaux heue. Nawh mawh pui pa ao min, pa grum naog mai Khuan Singax Singeh mai pingnya cuyi heue. Nawh yuh mhai pa daox deng mai krai grawng lo pui khawm uik ti yum rhawm ka Yesux.



Tix ngaix Sathephan mai cao kaing Yudax khankix thung thiang paox tix grawng Yesux. Kix kied song rhawm ka Sathephan mai kix krai grawng pa ang mawh pa ang meh heue. Kix pie ti krai grawng Sathephan mawh pui pa krai grawng Siyiex mai Mose ka daux pa ang mhawm. Khaix an kix giex ka Sathephan mai kix viex nawh hu sivoe cao giex kaing li pa ting mai cao kaing pui ceu Yudax khankix heue.




Cao giex kaing li chawk ka Sathephan, “Grawng pa ah kix ka maix yam in, mawh tete lie?” Nawh deeh pawk lox ah nin, “Pui pa cong ngawg khankix eue, pex sidien ka Khuan Singax jheeng jheeng, awm pa sax yuh tax du pex heue. Lheu khaing in pex hoik pah Misiyax yum, pa hoik ploi Siyiex hoek piang haktiex.



Yam kix mhong lox grawng ceu in khankix, lox in dung ka rhawm kix, kix thox yhaok tix mai yo sinum heue. Khaix an kix viex Sathephan hu plak praix veng mai kix dheem Sathephan ka simaox.



Yam kix dheem Sathephan ka simaox, nawh rawg buan ah nin, “Simiang Yesux eue, rieb ti teei khuan aux liak.” Mai nawh grux ngawng tix, kok yo lox sinum ah nin, “Simiang eue, paw teei ti deuh phimap in ka piang kix liak.” Khaix hoik ah nawh nan, nawh dud rhawm heue.




Sawlux khaw rhawm ka gawng pa teei kix Sathephan yum heue. Nawh mawh cao pau ti kia ngiien ka kraung pui pa dheem Sathephan ka simaox heue. Ka daux singaix an, Kawn Khrit khankix yaox ti kham krax tuktiak tikte. Mawh kheu nan kix prung prang hu ku dah ku dee jah ka daux meung Yudax mai tom hoek ka meung Samarix khankix heue.




Sawlux yieh ceu cao laux, laig ka daux ku nyiex, giex simex mai bun viex ti hu sau kix ka daux thawng heue. Nawh mhaing lai ka cao giex kaing li pa ting, son sang giex ka Kawn Khrit pa ot veng Damase mai viex hu ka veng Yerusaliem.




Yam hu Sawlux krax, nawh hoek ka dex veng Damase, mai dom mawx dom an pa riieng lih khaing raoma jhan rob nawh. Nawh mhong lox ah nin ka nawh, “Sawlux eue, Sawlux eue, maix lai tuktiak tukte Aux yuh ka mawx?” Mai nawh chawk ah nin, “Simaing eue, Maix mawh mawx?” Mai Nawh Cao deeh ah nin, “Aux mawh Yesux pa tuktiak tukte maix kah heue.”



Yam Sawlux kaoh khaiing piang tiex, yam blah nawh ngai tix, nawh ang lai chix yaox tidtix. Kix tuk taix nawh mai viex nawh laig ka daux veng Damase heue. Ka daux loe singaix nawh ang chix yaox, mai ang ih ang nyaux heue.



Yam an koe kawncau tix kaux pa kaux Ananix, pa ot ka daux veng Damase, Yesux ah nin ka nawh ka daux rieng susai, “Kaoh mai hu ka nyiex ot Sawlux, mai deuh taix tix ka piang nawh, yuh ka mawx son sang deeh chix yaox nawh heue. Kheu nawh mawh pa hoik laug Aux, son sang viex ceu kaux Aux hu sivoie pui tang cat khankix, Aux tag jhi nawh yaox grawng tag sang kham geu nawh miex ceu son ceu kaux Aux.” Ananix lih hu, mai laig ka daux nyiex an, mai deuh taix tix ka piang Sawlux mai rawg buan. Mai Sawlux deeh chix yaox heue.



Dom mawx dom an, Sawlux kham krax cubcom, mai nawh jah ti sidiex ka pui ceu Yudax khankix, grawng Yesux mawh kawm Siyiex. Pui tuktiak tukte ka Kawm Khrit tix kaux, tieh loh tix mawh pui pa yum rhawm ka Yesux, pui Yudax khankix kied daox deng kah. Sawlux kawx kham mhai rug grawng Yesux mawh Misiyax, plak sivoe pui ceu Yudax khankix mai thung thiang mai kix heue. Khaix an pui plak nie tawng ceu kaux Sawlux mawh Pawlux heue.



Khaix hoik naog singaix tom nie, pui Yudax khankix kum kawng paox tix grawng sang teei Pawlux yum heue. Mai kix pau siviex veng khankix leeing ngaix leeing sawm. Viang mawh nan, Pawlux tawng ceu pa hoik yiak kix. kawncaw nawh khankix teei nawh yam pon sawm, mai sau nawh daux phliex mai koi ploi nawh lih plak praix guh veng heue. Pawlux kawx to hu khaing veng an, mai baoux hu tang dah mai krai grawng Yesux Khrit ka pui khawm uik heue.

K. Deeh Thawk Theng Ka Been

1. Sathephan mawh pui pa yuh ka mawx?
2. Kheu pa tix cao kaing Yudax khankix song rhawm ka Sathephan mai kix yuh pa tix ka nawh?
3. Kheu pa tix kix dheem Sathephan ka simaox?
4. Sathephan rawg buan ka Siyiex yuh ka mawx?
5. Sawlux mawh pui pa yuh ka mawx mai yam hu Sawlux ka veng Damase, nawh yaox pa yuh ka mawx?
6. Sawlux deeh chix yaox yuh ka mawx?
7. Khaix hoik deeh chix yaox Sawlux, nawh lih ti mawh pui pa yuh ka mawx?
8. Kheu pa tix kix ploi Pawlux lih plak praix guh veng?

Kh. Krax Pa Doh Rhawm Ka Been

1. Yam kix dheem nawh ka simaox, Sathephan rawg buan son pui pa dheem nawh ka simaox kheu pa tix?
2. Kheu pa tix Yesux ah Sawlux mawh pui pa tuktiak tukte ka Nawh?

G. Krax Pa Deeh Shiao Daux Ju Tix Khaing Been

1. Ex caw ti koe rhawm rhi pa yuh ka mawx ka piang pui pa tuktiak tukte ka ex?
2. Maix pon riang rao pa tix ka daux been in, mawh pa yuh ka mawx?
3. Yam maix yaox pui pa tuktiak tukte ka Kawn Khrit khankix, maix sang yuh pa tix?

Ng. Ceu Pa Rieb Gau Ex Khaing Been In

1. Pui pa tuktiak tukte ka pui pa yum rhawm, awm tuktiak tukte ka Yesux Khrit heue.
2. Ex pui pa yum rhawm kawx caw ti rawg buan son pui pa tuktiak tukte ka ex.
3. Siyiex chix tieh loh ka rhawm rhi pui pa kiien rhawm mai pui pa caox khankix heue.
4. Caw ti teem ka paox tix yam yaox krax nu krax khawm.

P. Baux Lai Pa Caw Tix Ci


2Kawrinthux 5:17

Mawh kheu nan phan pui tix kaux kaux ot ka daux Cao Khrit, nawh mawh ceu pa khraox heue. Ceu pa prim khankix hoik grai hoik grup hu mai jhak heue, ceu an kix hoik lih mawh pa khraox heue.

Pawlux Mai Silax



Lai Kawncau 16:11-40




Pawlux mai paox gawm nawh Silax hu ka veng Philippix son sang krai gawng Simiang Yesux heue. Kiex yaox bun pa ceep kraung raoh klai pa mawh Ludi ka daux veng an heue. Nawh mawh bun pa sidaing moh ka Siyix heue.




Siyix paoh daux rhawm nawh mai kieh nawh rieb ka Yesux, tokaux nawh mai nyiex ma nawh rieb krax cubcom heue. Nawh kok ka Pawlux mai Silax hoek ti paung ka daux nyiex tix heue.




Pawlux mai Silax hu son sang rawg buan ka dauv veng Philippix tivud tivud heue. Tix singaix, yam hu kiex ra kaux ka dauv krax, bun siliex tix kaux pa koe phi jhai hawt khaix kiex heue. Mawh kheu pon krai nawh lox jhai, nawh tom pon sawg cao tix cie mau tom nie heue.




Nawh kok yo mai ah nin, “Pui in mawh siliex Siyiex pa pon tawx krax luat luan ka son ex.” Pawlux lulax rhawm kheu yo nawh yuh nin ku bawg yam heue.




Tix singaix, Pawlux hu ka bun an mai grheu phicaox an ka daux ceu kaux Yesux, phicaox an lih hu dom mawx dom an heue.



Khaix mhong cao nawh grawng Pawlux grheu phicaox lih khaing siliex tix nawh sidaing song rhawm heue. Mawh kheu ang siliex nawh lai pon sawg tawx mau ka nawh heue.



Mawh kheu nan nawh tom giex Pawlux mai Silax, lah kiex mai sau dauw thawng heue.




Kix tom sau Pawlux mai Silax dauw lawg plak dauw mai sau caong kiex dauw gang heue. Yam hoek bawg yam greung sawm, Pawlux mai Silax rawg buan mai rhax lai yaogyaw ka Siyiex heue.



Dom an tuk kla reem ting yung yang siviex thawng baoh, gang mai ceng pui thawng ku kaux hoik gah khawm uik heue.



Yam yaox cao giex kaing thawng siviex thawng baoh khawm uik, nawh keud pui thawng khawm uik lih hu, nawh tom khi mai keud ti sang plaux ju tix heue. Yam yaox Pawlux cao giex kaing thawng sang plaux tix, nawh tom yo mai ang cu nawh plaux ka tix heue.



Ngaix khaix, cao kaing veng khankix ploi Pawlux mai Silax, nhie kiex lih hu khaiing veng Philippix heue. Khaix hoik hu Pawlux mai Silax ka Ludi mai paox grawm nawh khankix, kiex lih hu khaiing veng Philippix heue. Gumlox buan pre hu mai lih ti mawh ceu cao pa ting heue.



Pawlux mai pui pa yum rhawm khankix lih hu ka dauv veng tang dah mai krai grawng krax taoh Yesux heue. Kix tiem ti tawx lai ka ceu cao khankix, son sang tawx riang rao mai gau ka kix heue. Lai an kix mawh lai pa koe dauv Phuk Lai Sigang Khri pa phat ex yam in tiblah heue.

K. Deeh Thawk Theng Ka Been

1. Pawlux mai Silax hu paung nyiex pui mawx? Bun an mawh pa yuh ka mawx?
2. Bun pa koe phi jhai, jhai ah yuh ka mawx grawh grawng Pawlux mai Silax?
3. Kheu pa tix cao bun phi jhai an song rhawm ka Pawlux mai Silax mai yuh pa tix ka kiex?
4. Kheu lox yaogyaw Pawlux mai Silax, ka daux thawng lih ti mawh ceu pa tix?
5. Kheu pa tix Pawlux tiem ti tawx lai ka ceu cao khankix?

Kh. Krax Pa Doh Rhawm Ka Been

1. Sax yaox maix pui pa koe phi jhai lie? Jhawm pakpeung kix koe yuh ka mawx?
2. Daux been in, ex yaox jhawm cao phi jhai koe yuh ka mawx?
3. Viang Pawlux mai Silax pon to lih khaing thawng kawx, kheu pa tix kiex ang lih hu khaing thawng?

G. Krax Pa Deeh Shiao Daux Ju Tix Khaing Been

1. Yam ot Pawlux mai Silax daux thawng, viang kiex yaox ti kham geu krax pa lah kawx, kiex pon yaogyaw buanson Siyiex heue. Yam yaox maix krax pa kha rhawm, maix sang pon yaogyaw Siyiex yuh ka mawx?
2. Kheu kaux Sijax Pawlux mai Silax, cao kaing thawng luat luan khaing krax yum. Ex sang chix kaux sijax yuh ka mawx ka daux kaing pa yuh tix?

Ng. Ceu Pa Rieb Gau Ex Khaing Been In

1. Viang ex yuh kaing pa mhawm kawx, bawg tibbleh chix lih ti mawh kaing pa ang khaw ka rhawm pui tang kaux.
2. Siawp sibrawm koe ka daux lox yaogyaw ex ka Siyiex.
3. Buanson krax pa yaogyaw ka Siyiex, kieh ex pon krax pa luat luan khaing krax pa phiawk phicaox mai ceu pa nu pa khawm khawm uik mai kieh min Siyiex sidawng heue.

P. Baux Lai Pa Caw Tix Ci

Lai Yohan 8:32

Pex tag tawng pa mawh pa meh, mai pa mawh pa meh an tag sang kieh pex luat luan.

Yesux Mawh Misiyax




Yam Jah 1-3. 6. 14. 22, Lih Hu 12. 20, 2Samoelax 7,
Hebrie 3:1-6. 4:14-5:10, 7:1-8:13, 9:11-10:18, Plak Jhi 21



Khaix hoek phan Siyiex ku ceu khawm uik, hoik mawh pa grum naog mai nyawm ti yaox heue. Phimap kawx ang koe. Adam mai Evax kawx moh ka paox tix awm moh kiex ka Siyiex heue. Krax yum, krax saux kawx ang koe. In kix mawh rhawm rhi pa simie Siyiex ti cie piang haktiex heue.



Satan yuh ti awm pakpeung si-uing ot ka daux sipeem mai nyaw glaw ka Evax. Adam mai Evax hoik lud yuh phimap kheu thieng ka lox Siyiex heue. Kheu phimap kiex ra kaux, krax saux krax yum lih ti hoek ka piang haktiex heue.



Mawh kheu phimap an krax pa sitee kiex tix mai Siyiex hoik laux hu heue. Mai pui khawm uik lih mawh pa koeng ka Siyiex kheu phimap an heue. Siyiex koe rhawm ti sang cox ceu pa laux an kix khawm uik heue.




Ka daux kawn praix Evax tix kaux tag sang dig kaing Satan ka loek tix, Satan kawx tag sang kiied caong nawh heue. Dee bleeh mawh Satan tag sang plaux ka Simiang Yesux. Viang mawh nan Siyiex tag sang deeh kieh Nawh kaoh im ka daux loe singaix heue. Mawh kheu nan Siyiex tom ah sang yieh ka siawp Satan khawm uik heue.




Yam Siyiex deeh sigrhah haktiex ka rawm, son pui pa yum rhawm ka Nawh, Nawh cox khre reu ka son kix heue. Pui khawm uik viang hoek krax laux kheu phimap kawx, Siyiex cox khre Simiang Yesux son kawn pui pa yum rhawm mai tawx krax taoh heue.




Cao jhai Malakhizediek mawh cao giex kaing li pa nawb buan ka piang Abraham heue. Simiang Yesux kawx mawh cao giex kaing li awm Malakhizediek heue. Viang mawh nan Simiang Yesux mawh cao giex kaing li pa ting khaing paox tix heue. Son sang sigrhah ka phimap kawn pui, Nawh tawx tokaux tix mawx to tan heue.



Siyiex ah nin ka Abraham, kheu maix aux tag sang kieh pui haktiex khawm uik pon buanson heue. Simiang Yesux mawh daoh doeh Abraham tix kaux heue. Pui haktiex khawm uik hoik pon buanson kheu Abraham heue. Phan mawh pui pa yum rhawm ka Simiang Yesux hoik mawh pui cie Siyiex pa hoik laug ti deuh mai awm daoh doeh ju khuan Abraham heue.



Son ang Abraham yaox ti tan kawn tix, Siyiex cox khre to tan pa mawh kawn yung tang lcak heue. Simiang Yesux kawx awm kawn yung an heue. Mawh kheu tawx Nawh tokaux tix ka son ex khawm uik heue. Ex kawn pui, maix mai aux mawh pa keung ti yum son phimap pa yuh tix heue. Viang mawh nan Siyiex kieh Simiang Yesux yum tang ex heue.



Siyiex kieh krax pa ciyang hoek ka piang meung Ejiptux, lheu khaing nyiex ma pui Isarilax pa plaux kawn yung pa ang koe pa saux mai kraix nham ka siviex nyiex tix heue. Kawncau roma ang lai plaux kawn Ai kix kheu yaox ka nham pa kraix ka siviex heue.




Simiang Yesux awm kawn yung pa shiao ka daux poi Pasakha heue. Simiang Yesux mawh pa grum naog mai pa ang koe phimap heue. Mai kham ti yum bawg yam yuh poi Pasakha heue. Nham Simiang Yesux hoik sigrhah ka phimap kawn pui mai kieh luat luan khaing krax pa ciyang Siyiex heue.



Siyiex tawx sijax mukheu pa khraox son pui Isarilax. Pui ceu pa tix ang ah phan rieb ka Simiang Yesux tag lih ti mawh pui cie Nawh heue.



Mose mawh cao jhai ting pa krai gumlox Siyiex tix kaux heue. Simiang Yesux kawx mawh cao jhai awm Mose heue. Mawh cao jhai pa ting khaing paox tix mai mawh gumlox Siyiex heue.



Siyiex hoik tawx lox sijax mukheu ka Davit ah ti sang kieh Misiyax lih ka daux daoh doe nawh heue. Simiang Yesux mawh Misiyax, pa koe min khaing paox tix ka daux daoh doe Davit heue.



Simiang Yesux mawh Simiang awm Davit heue. Viang mawh nan Nawh mawh Simiang piang simiang, ka piang haktiex mai raoma heue. Nawh tag sang deeh lih hoek mai kuang ka meung cie Nawh ka daux krax pa yiien yawg heue.

K. Deeh Thawk Theng Ka Been

1. Siyiex koe rhawm rhi pa yuh ka mawx ka piang ceu pa hoik phan Nawh?
2. Mawh kheu phimap, krax pa sitioe kawn pui mai Siyiex viang hoik laux hu kawx, Siyiex tawx lox sijax yuh ka mawx ka kawn pui?
3. Grawng Siyiex sigrhah haktiex ka rawm mai grawng Yesux koe krax sitioe vheuk yuh ka mawx?
4. Yesux awm cao giex kaing li pa yuh ka mawx?
5. Grawng krax tan gleeing Abraham mai grawng krax tawx Yesux ju tix piang khaox lhak koe dee bleeh yuh ka mawx?
6. Poi Pasakha plak jhi grawng Yesux yuh ka mawx?
7. Yesux awm cao jhai pa yuh ka mawx mai awm simiang pa yuh ka mawx?

Kh. Krax Pa Doh Rhawm Ka Been

1. Sijax mukheu pa prim mai pa khraox koe dee bleeh yuh ka mawx?
2. Siyiex ah sang yieh ka siawp Satan khawm uik. Siawp Satan mawh pa yuh ka mawx?

G. Krax Pa Deeh Shiao Daux Ju Tix Khaing Been

1. Son sang luat luan khaing siawp Satan maix sang yuh ka mawx ka daux ju maix?
2. Maix hoik pon rieb Yesux mawh Misiyax pa ploi Siyiex hoek son maix lie?
3. Maix kawn pon riang rao pa tix khaing daux been in?

Ng. Ceu Pa Rieb Gau Ex Khaing Been In


1. Yesux mawh daux krax pa siteo sinax kawn pui mai Siyiex.
2. Yesux hoik pex ka siawp Satan ka daux pa hoik kaoh im khaing krax yum.
3. Yesux mawh kawn yung pa yum tang phimap ex kawn pui.
4. Yesux mawh gumlox sijax mukheu pa khraox pa tawx Siyiex.
5. Yesux mawh Simiang piang simiang, ka piang haktiex mai raoma heue.

P. Baux Lai Pa Caw Tix Ci

Lai Yohan 14:6

Yesux baux pawk lox mai ah nin ka nawh, “Aux mawh daux krax mai pa mawh pa meh mai ju heue. Phan ang mawh daux Aux, pui tix kaux kawx ang pon hoek ka Keeing Cao.”

Lox Sijax Mukheu Pa Khraox Cie Siyiex




Romax 3:21–26, 5:1–11, Yohan 3:16, Makux 16:16,
Kawlawsie–1:13–14, 2Thesalonix 5:17–21, 1Yohan–1:5–10




Marix mawh bun krih pa singax tom yam ang nawh nyang bax keh Simiang Yesux heue. Mawh kheu mawh Simiang Yesux kawh Siyiex heue. Nawh mawh Siyiex mai mawh Kawh Pui heue.



Simiang Yesux jhi mhai sakse grawng mawh Nawh Siyiex heue. Kieh puk pak rawm yiien yawg, pai pui pa saux moi, grheu phicaox lih, kieh pui pa yum deeh kaoh im mai kieh pui 5000 kaux sak ih ka khaomun 5 lon mai kax 2 mu heue.



Simiang Yesux mawh cao gau pa mhawm heue. Nawh sidiex gau ka grawng pa caw ti moh ka paox plawg tix awm moh ka tokaux tix heue.



Mai caw ti nie lheu moh ka Siyiex tix khaing sin ngao pa koe tix khawm uik piang haktiex heue.



Simiang Yesux sidiex gau ah nin, “Krax taoh nie lheu mhawm ting ngawh khaing pa koe ka piang haktiex heue.”




Lheu khaing pui pa rieb ti yum rhawm ka Yesux pui tix kaux kawx ang pon hoek krax taoh. Pui ang pon krax taoh yam hoek singaix ghoik, nawh tag sang yaox ti kham krax pa taing ti sau ka daux ngu pa hax, pa mawh Mawnarhok heue.”



Nawh ah nin, “Siyiex sidaing moh ka kawn phimap heue. Siyiex pluat ploi ka phimap kawn pui mai rieb nawh mawh kawn Tix heue.




Pui haktiex khawm uik yuh phimap mai singai khaing Siyiex heue. Kheu phimap, kawn pui lih ti mawh pui koeng mai Siyiex, viang mawh nan Siyiex koeng ka phimap heue.



Viang mawh nan mawh kheu sidaing moh Nawh ka haktiex, Nawh tom tawx Kawn tix Yesux Khrit heue. Phan yum rhawm ka Simiang Yesux ang lai hoik krax laux mai pon ti ot tau mai Nawh heue.



Maix mawh kawn phimap heue. Mawh kheu nan maix pon krax pa song rhawm cie Siyiex heue. Viang mawh nan Siyiex tik krax pa song rhawm Tix ka piang Yesux khawm uik heue. Simiang Yesux hoik kham ti yum tang phimap ex ka piang khaox lhak heue.



Simaing Yesux kham ti tawx tokaux tix mawh kraung tan son maix mai son pui piang haktiex khawm uik heue. Kheu krax pa kham geu Nawh, pon krax luat luan khaing phimap khawm uik heue.




Krax pa mhawm, krax pa cuca ang pon tawx krax taoh ka ex. Ceu pa cuca ex ti yuh ku ceu ang pon kieh ex dex mai Siyiex heue. Phan rieb Simiang Yesux mawh kawn Siyiex, yum rhawm ka grawng kham Nawh ti yum mai grawng pa hoik deeh kaoh im Nawh, tag pon krax taoh heue.




Phan yum rhawm ka Simiang Yesux mai rieb krax com rawm tag pon krax taoh heue. Phan ang yum rhawm tag pon krax pa thiang ti tik khaing heue. Siyiex ang laug pui mi, pui hot, pui ceu, ju koe, Nawh moh kawn pui awm paox tix khawm uik heue. Yesux koe rhawm ti kieh kawn pui khawm uik yum rhawm ka Tix heue. Pui pa yum rhawm ka nawh tag mawh paox grawm mai Nawh heue.




Yesux mawh kawn Siyiex, Misiyax maix yum rhawm kah lie? Maix mawh kawn phimap mai pon krax pa song rhawm Siyiex, yum rhawm maix kah lie? Maix yum rhawm grawng kham Simiang Yesux ti yum tang maix piang khaox lhak lie? Simiang Yesux simie maix hoik ka Tix, simie maix yum rhawm ka Tix mai simie maix rieb krax cubcom heue.



Phan maix yum rhawm ka grawng in kix maix hoik mawh Kawn Khrit heue. Siyiex thung maix lih khaing ka daux meung Satan, pa vhaik mai viex maix laig ka daux meung pa riieng cie Nawh heue. Ceu pa prim khawm uik hoik grai uik. Mawh kheu Siyiex hoik tieh loh maix mawh pa khraox heue.



Phan maix mawh pui pa yum rhawm ka ceu pa hoik yuh Simiang Yesux khawm uik, Nawh kieh maix luan khaig phimap heue. Mai ang lai jhak maix awm pui pa koeng Tix mai nawh jhak maix awm paox grawm tix heue.



Phan maix mawh paox grawm cie Siyiex, maix simie ti hawt awm pa gau Simiang Yesux khaing heue. Viang mawh pui pa yum rhawm kawx kawn yaox ti silah mai phimap(phicaox)heue. Phan maix doh keud ka phimap tix mai khiox khaw ka Simiang Yesux, Nawh tag pluat ploi phimap maix mai tawx riang rao ka maix heue.



Siyiex tawm ti deuh lox son sang rawg buan, son sang phat Phuk Lai Sigang Khri, son sang yuh kaing krub mai paox pui pa yum rhawm tau heue. In kix khawm uik mawh pa ting ceu, mawh pa kieh ex nie sitee tix dex dawd mai Siyiex mhawm mhawm heue.

K. Deeh Thawk Theng Ka Been

1. Yesux mawh pui mawx mai Nawh yuh ceu pa daox deng ceu pa tix?
2. Yesux gau ex koe krax moh pa yuh ka mawx?
3. Yesux krai grawng Siyiex moh kawn pui yuh ka mawx?
4. Krax pa kham Yesux ti yum, koe buanson yuh ka mawx?
5. Mawh pui pa yuh ka mawx pa pon krax taoh?
6. Yesux tawm lox yuh ka mawx ka pui pa yum rhawm ka Nawh khankix mai pui pa hawt khaix Nawh?

Kh. Krax Pa Doh Rhawm Ka Been

1. Maix yaox yuh ka grawng ah “Awm mawh Yesux Siyiex, Nawh mawh Kawn Pui”?
2. “Krax Taoh” ah ex koe dee bleeh yuh ka mawx?
3. Krax im ju kawn khrit pa krai Yesux mai krax im ju kawn khrit baux yam in tang yuh ka mawx?

G. Krax Pa Deeh Shiao Daux Ju Tix Khaing Been

1. Ka daux been in maix yaox krax moh Siyiex koe yuh ka mawx?
2. Khaix hoik mhong maix been in, maix sang im ju yuh ka mawx ka daux pa mawh maix kawn khrit?
3. Mawh kheu pa tix maix rieb ti yum rhawm ka Yesux Khrit. Kham mhai sakse liak?

Ng. Ceu Pa Rieb Gau Ex Khaing Been In


1. Siyiex moh ka ex kawn phimap. Viang kawx koeng ka phimap.
2. Siyiex koe rhawm ti kieh ex yuh paox pie tau mai paox kawn pui tix, ka daux ceu kaux Nawh heue.
3. Kheu pa yum Yesux Khrit piang khaox lhak mai pa deeh kaoh im Nawh, ex pon ti mawh pui pa khraox heue.

P. Baux Lai Pa Caw Ti Ci


Lai Kalatix 6:15

Grawh grawng nawh ka daux Yesux Khrit pa pat hak ang ah, pa ang pat hak ang ah, ang koe buanson tidtix. Vaing mawh nan ceu pa koe buanson mawh ngie pa mawh pui pa khraox heue.


Simiang Yesux Sang Deeh Hoek



Mathiex 24:14,28:18, Yohan 15:20, 16:33, Plak Jhi 2:10,
Mathiex 13:24– 30,36–42, 1Thesalonix 4:13–5:11, Yakop 1:12,
Matiex 22:13, Plak Jhi 20:10,21:1–22:21




Grawh grawng Yesux pa mawh Misiyax nie tah hu piang haktiex mai pui yum rhawm kawx nie hun hu sipie sipie, ka daux 2000 num haoh in heue. Singaix sidah haktiex Simiang Yesux, Nawh ah ti sang deeh hoek heue. Viang mawh nan Nawh ang nyang hoek tom singaix heue.



Yam kawn pau ex bawg yam pa sang deeh hoek Yesux, ex pui pa yum rhawm caw ti kieh krax im ju tix singax mai im ju awm mawh tix kawn Siyiex heue. Singaix tah gumlox buan ka pui ceu ku ceu pa koe piang haktiex in, mawh singaix sidah haktiex heue.



Pui tom nie ang nyang sax mhong ka grawng Simiang Yesux heue. Yam ang Simiang Yesux nyang ing piang meung rao ma Nawh tawm ti een ka pui pa yum rhawm mai tawx beeh glawm son sang yuh gumlox buan ka pui pa ang nyang sax mhong heue. Simiang Yesux ah nin “Pex hu mai kieh ceu pui khawm uik mawh kawncaw mau soi Aux heue. Nghox pa pon ti vawg hoik kaux heue.”



Simiang Yesux ah nin “lien ang ting lhaong awm simiang tix heue. Pex tag sang yaox krax pa nu nai kheu Aux. Maix tag sang yaox krax kha rhawm piang haktiex in heue. Aux hoik pex ka Satan heue. Kaux sijax tom yum tix awx. Aux hoik krai, maix tag sang pon krax taoh heue.”




Nawh Cao baux plak kix yaox lox phek tiem ah nin, “Meung raoma tag awm pui pa rhuat simie pa mhawm ka daux ma. Viang mawh nan yam hoik it pui, pui koeng hoek mai rhuat simie vhang ka daux sinax nghox ca an, mai lih hu heue.




Yam kuah gawng mai lhax, mai sigleem plix, siliex khankix hu ka cao nyiex mai ah nin, “Simiang eue, yam rhuat maix simie daux ma maix, maix rhuat pa mhawm ang mawh lie? Yuh ka mawx vhang lai koe?” Mai nawh ah nin ka kix, “Ceu in mawh pa hoik yuh pui koeng heue.”




Siliex khankix baox ah nin, “Maix simie ex hu khrawm vhang khankix lie?” Viang mawh nan, nawh pawk lox ah nin, “ Phan pex hu khrawm vhang khankix, ha pex kox reeig riah nghox ca glaoh heue. Pau tom hoek bawg yam vawg, phan hoek bawg yam vawg, tag khrawm vhang mai gleeing kix ka ngu. Viang mawh nan khrawm nghox ca mai sau daux krao aux heue.”



Mawh kheu kawncau khankix ang tawng dee bleeh, kix mhaing Simiang Yesux krai dee bleeh ah nin, “Aux mawh cao pa rhuat simie pa mhawm heue. Lawk kaung khankix mawh haktiex heue. Simie pa mhawm khankix mawh pui pa ot daux meung Siyiex heue.




Simie pa ang mhawm khankix mawh pui pa shiang mai pa ang mhawm heue. Pui pa sum simie pa ang mhawm mawh Satan heue. Bawg yam vawg nghox mawh yam sidah haktiex heue. Cao vawg nghox khankix mawh kawncan raoma khankix heue.




Yam sidah haktiex pa shiang mai Satan khankix kraix khawm tix ka daux pa yiem yo mai kreeik rhang tix mai gleeing ka daux ngu heue. Khaix an pui pa rah see khankix tag rieng awm koek ka daux meung Siyiex heue.”



Simiang Yesux tag sang deeh lih hoek awm tokaux yam ing Nawh daux meung rao ma. Nawh hoik tawx lox sijax mukheu yuh nin, yam deeh hoik Nawh pui pa yum rhawm pa hoek yum khankix tag sang deeh kaoh im mai deeh ot tau mai Nawh ka daux meung raoma heue.



Pui pa yum rhawm pa kawn im ju khankix kawx tag sang yaox ti ot tau mai Nawh. Pui pa yum rhawm khawm uik tag sang yaox ti ot tau mai Simiang Yesux heue.




Pui pa yum rhawm khankix tag sang pon mhok khri, pui pa ang yum rhawm khankik tag sang laig daux krax yum ra bawg tix bawg ka daux Mawnarhok heue. Pui pa yum rhawm khankix pon krax yiien yawg grum naog mai yaox ti ot tau mai Simiang Yesux ku jheeng heue.



Phan mawh pui pa ang yum rhawm, Siyiex tag prawng see mai tik kix ka daux ngu mawnarhok heue. Kix tag sang yaox ti yiien mai greeik rhang tix tan heue. Kix tag gleeing ka daux dee ang viag yum ka daux ngu pa gleeing leeing ju heue.



Simiang Yesux tag sang yieh ti tik ka Satan mai meung cie nawh ka daux dung ngu pa gleeing leeing ju heue. Krax pa yum khawm uik tag sang tik ka daux dung ngu Mawnarhok heue.



Simiang Yesux tag sang phan haktiex pa khraox mai raoma pa khraox awm bawg yam ang Adam mai Evax nyang yum daux phimap heue.



Khaix an Simiang Yesux tag kuang ka daux meung raoma. Ka daux meung raoma ang lai koe krax yum, krax saux, krax laux rhawm mai yiem grai khankix heue. Simiang Yesux tag kuang ka meung cie Nawh ka daux pa yiien yawg mai pui cie Nawh tag sang yax ti ot tau mai Nawh ku jheeng heue.

K. Deeh Thawk Theng Ka Been

1. Ka sang hoek Yesux Khrit ra bawg tix bawg, ex kawn khrit caw ti im ju yuh ka mawx?
2. Siyiex nhie ex yuh lox buan yuh ka mawx?
3. Yesux krai lox pheh tiem pa yuh ka mawx?
4. Yesux krai dee bleeh lox pheh tiem yuh ka mawx?
5. Ka sang haok piang meung raoma Yesux tawx sijax mukheu yuh ka mawx?
6. Yam deeh hoek Yesux ra bawg tix bawg, Nawh sang prawng see yuh ka mawx?
7. Yesux sang ciyang ka Satan yuh ka mawx mai sang deeh phan haktiex pa yuh ka mawx?

Kh. Krax Pa Doh Rhawm Ka Been

1. Grawng lox pheh tiem pa krai Yesux mai kaing satsana pa yuh ex yam in sitioe vheuk tix yuh ka mawx?
2. Maix yaox beeh glawm pa caw ceu cao ti yuh koe yuh ka mawx ka daux been in?
3. “Nghox pa pon tix vawg hoek kaux heue.” koe dee bleeh yuh ka mawx?

G. Krax Pa Deeh Shiao Daux Ju Tix Khaing Been

1. Yesux krai, “Nghox pa pon tix vawg hoek kaux heue.” Son sang pon vawg ka nghox pa pon tix vawg, maix pon yuh ka daux blawng pa yuh ka mawx?
2. Yesux tawm lox, “Kaux sijax tom yum tix awx.” Maix sang pon kaux sijax tom yum ka daux ju maix yuh ka mawx?
3. Maix hoik cox khre krax yum rhawm maix yuh ka mawx ka sang hoek bawg yam vawg nghox?

Ng. Ceu Pa Rieb Gau Ex Khaing Been In

1. Krax yum rhawm ex caw ti kaux tom yum tix.
2. Ka sang hoek Yesux ra bawg tix bawg, ex caw tix niied yuh lox buan gaux rhawm ka pui pa ang nyang sax mhong grawng krax taoh heue.
3. Phan hoek singaix sidah haktiex in, ceu pa koe ka piang haktiex khawm uik tag sang laux leeing heue.
4. Yesux sang yuh meung Satan laux mai sang yuh haktiex pa khraox mai raoma pa khraox son pui pa yum rhawm ka Nawh.
5. Yesux tag sang kuang ka haktiex pa khraox an ka daux pa yiien yawg heue.

P. Baux Lai Pa Caw Tix Ci

Lai Pa Plak Jhi 2:10 (kh)

Kieh maix kaux sijax tom yum mai Aux tag tawx mhok khri pa im ju ka maix heue.

